

共同經課 - 1 列王記上十九章一節~十五 a 節

1 亞哈將以利亞一切所行的及伊用刀劊眾先知的事攏給耶洗別講。2 耶洗別就差人去見以利亞，給伊講：「明日日約略此時，我若無互你的生命親像 in 中間一人的生命一樣，願許個上帝加倍責罰我。」3 以利亞看見按呢就起來走，來逃命，到猶大的別是巴，將奴僕留佇遐。4 家已入去曠野行一日的路站，到一欉羅騰樹腳，就坐佇遐求死，講：「今息啦！耶和華啊，求你取我的生命，因為我無比我的列祖卡贏。」5 就倒佇羅騰樹腳，暈去。有天使來搭伊，講：「起來食！」6 伊看伊，就看見有餅燻佇火炭的頂面，閣有一瓶水佇伊的頭殼邊，伊就食就飲，閣倒落去。7 耶和華的天使第二擺閣來搭伊，講：「起來食啊！因為路真遠你行無法得。」8 伊就起來食伊飲伊，倚靠此擺食的力，行四十日四十暝，到上帝的山，就是何烈山。9 伊到遐入一個洞，就踎彼內。看啊，耶和華的話臨到伊，給伊講：「以利亞啊，你佇遮創甚麼？」10 伊應講：「我為著耶和華——萬軍的上帝大熱心；因為以色列人棄揀你的約，毀壞你許個壇，用刀劊你許個先知，只有剩我一人，in 猶數想我的生命欲取伊。」11 講：「你出來倚佇山裡，佇耶和華的面前。」看啊，耶和華經過，有大閣透的風，破裂諸個山，拍碎諸個石佇耶和華的面前；總是耶和華無佇風的內面；風了後有地動，耶和華也無佇地動的中間；12 地動了後有火，耶和華也無佇火中；火了後有細閣輕的聲。13 以利亞聽見，就用外衫罩面，出去倚佇洞口。看啊，有聲臨到伊講：「以利亞啊，你佇遮創甚麼？」14 伊講：「我為著耶和華——萬軍的上帝大熱心；因為以色列人棄揀你的約，毀壞你許個壇，用刀劊你許個先知，只有剩我一人，in 猶數想我的生命欲取伊。」15 耶和華給伊講：「去啊，你倒去，到大馬色的曠野。」

共同經課 - 2 詩篇四十二篇

1 [可拉後裔教示的詩；交互樂官。] 上帝啊，我的心切切欣慕你，親像鹿切切欣慕溪水。2 我的心嘴乾欣慕上帝，就是活的上帝；我啥時會到上帝面前來見伊啊？3 我暝日用我的目屎準飯食；in 對我講無息：你的上帝佇叨落？4 我早前及眾人做陣去，導 in 到上帝的厝，用歡喜謳嘍的聲，大家守節。我追念諸個事，我的心極其悲傷。5 我的心啊，你啥事鬱悴？啥事佇我的內面著急？你著向望上帝，因為伊的面向我來拯救我；所以我猶久欲謳嘍伊。6 我的上帝啊，我的心佇我的內面鬱悴，所以我對約但的地及黑門，亦對米薩的山記念你。7 你的瀑布出聲，就深淵及深淵相叫應；你的波浪你的大湧攏淹密我。8 總是耶和華日時欲施出伊的慈愛；暝時，伊互我唱歌來求賞賜我活命的上帝。9 我欲對上帝——我的石磬講：你啥事袂記得我？我啥事因為對敵的壓迫憂悶來行啊？10 我的對敵譏刺我，親像拍碎我的骨頭，in 對我講無息：你的上帝佇叨落？11 我的心啊，你啥事鬱悴？啥事佇我的內面著急？你著向望上帝，因為我猶久欲謳嘍伊。伊是我的面的榮光，亦是我的上帝。

共同經課 - 3 加拉太書三章二十三節~二十九節

23 總是此個信未到的代先，咱受顧守佇律法下，圍啲來聽候欲顯明的信。24 按呢，律法是做管顧囡仔的，導咱到基督，互咱對信來稱做義。25 若是信已經到，就無閣降服佇管顧囡仔的。26 因為恁對信靠基督耶穌攏做上帝的子。27 因為恁見若受洗禮來入佇基督的，是曾穿基督。28 無有猶太、抑是希利尼、奴僕、抑是自由的，查甫人婦仁人的分別，因為恁佇基督耶穌攏是一個。29 恁若屬基督，就做亞伯拉罕的後裔，照應允來做後嗣。

共同經課 - 4 路加福音八章二十六節~三十九節

26 船到格拉森人的地方，就是加利利的對面。27 耶穌離開船上岸，有一人對城裡出來抵著伊，是患著鬼的。久久無穿衫，無厝內，獨獨佇墳墓中。28 看見耶穌就喉叫，仆佇伊的面前，大聲講：「至高上帝的子耶穌，我及你有甚麼干涉？求你莫得苦楚我！」29 因為耶穌有命令邪神對彼個人出來。因為邪神常常掠伊；人用鐵鍊鍊伊，用腳銬銬伊，來顧守伊，伊就掇斷所縛伊的器具，伊互鬼趕到曠野。30 耶穌問伊講：「你叫甚麼名？」伊講：「營」；因為有多多鬼入伊。31 鬼求耶穌，莫得吩咐 in 入深淵。32 佇遐有歸陣豬佇山裡啲討食。鬼求伊，准 in 入許個豬。就准 in，33 鬼就對彼人出去，入許個豬。歸陣豬就走落山坪，剝落湖激死。34 顧豬的看見此個代誌就走去，報城內及鄉社的人知。35 in 就出來愛看此個代誌；就近耶穌，抵著鬼所對伊出來彼人，穿衫，唔哉，坐佇耶穌腳下，in 就驚。36 看見的人將患著鬼的人怎樣得著救報 in 知。37 格拉森四方的人，攏求耶穌離開 in，因為 in 大驚的緣故；伊就上船倒轉去。38 鬼所對伊出去的人求欲及伊去，若是耶穌差伊去，講：39 「倒去恁兜，將上帝為著你行許大的事排列互人知。」伊就去，遍城宣傳耶穌為著伊所行許大的事。